

# Art culinaric da la classa superiura

San Murezzan: Festival per gourmets

DA GION NUTEGN STGIER / ANR

■ **L'edizium da giubileum dal Festival per gourmets da l'emna passada en l'Engiadin'Ota è stada in vair success. 4500 mangiabains han fatg ina bella vita cun giudair las bunas tratgas dals nov stars-cuschiniers. Ils organisaturs da l'occurrèzza han fatg ina bilantscha positiva.** Cun il grond final en l'hotel Suvretta House a San Murezzan è la 25avla edizium dal Festival per gourmets ida a fin sonda saira. Ina edizium da giubileum che vegn ad ir en l'istorgia cun avair gè lieu l'occurrèzza per mangiabains per l'emprima giada nov dis. En il center dal festival èn stads ils nov cuschiniers e cuschinieras da la classa superiura cun inchantar ils gourmets cun lur tratgas da qualitat fitg auta. Cuminaivel cun ils cuschiniers dals hotels da San Murezzan e

conturn, che han fatg part dal festival, han ils giasts-cuschinunzs procurà per ina vasta aventura culinara sco darar ils davos 25 onns dal festival per mangiabains. Per tut quai ch'è vegnì sin ils plats exista be in giudicat: Art culinaric da la classa superiura

## Be resuns allegraivels

Las grondas occurrenzas eran già ditg avant l'avertura dal Festival per gourmets vendidas or e quai per in bun pretsch. Sulet il grond «Opening» en las localitads da l'hotel Kulm a San Murezzan ha atratg 400 gourmets. Amez l'occurrèzza ha lura gè lieu la saira a partir da las 22.00 la gronda «Kitchen Party» en la cuschina da l'hotel Badrutt's Palace a San Murezzan cun ina participaziun da 250 gourmets internaziunals. La saira finala cun in



Reto Mathis, in dals iniziants dal Festival per gourmets, è cuntent che tants mangiabains han chattà la via en l'Engiadin'Ota per sa laschar ir bain.



Els trais han persvas la giuria tar la concorrenza da cuschinar d'emprendists: Mathias Müller, Fabio Berger e Valentin Minder (da san.).

FOTOS A. METTLER

dîner da tschintg plats, cun musica classica e la moderaziun d'Annina Campell, ha lura gè lieu en l'hotel Suvretta House a San Murezzan e quai cun 230 mangiabains che han sa laschà custar quella saira 550 francs per persuna. Dentant er las occurrenzas pli pitschnas han sveglià l'interess dals gourmets. A la fin han 4500 visitaders contribuì che l'edizium da giubileum dal Festival per gourmets 2018 è stada in vair success. Reto Mathis, il president da las occurrenzas, è sa mussà fitg ventiraivel dals blers resuns allegraivels dals numerus gourmets ch'èn stads du-

rant nov dis en l'Engiadin'Ota per sa laschar ir culinaric bain.

## Onur per trais cuschiniers giuvens

A chaschun dal Festival per gourmets ha er adina lieu ina concorrenza da cuschinar per la garda giuvna, ditg auter l'elita da damaun dals cuschinunzs. Da la concorrenza «Young Engadine Talents» fan part emprendists-cuschiniers da numerus hotels da Segl fin Puntraschigna. Els cuschinar in menu da plis plats ed ina giuria cun persunas dal rom valitescha las

spaisas finas. Persvas il pli fitg la giuria ha Fabio Berger, el ch'è dapi trais onns emprendist-cuschinier tar Fabrizio Zanetti en l'hotel Suvretta House a San Murezzan. Sco victur da la concorrenza dastga el schizunt far in praticum tar Tanja Grandidts en il restaurant da luxus Stucki a Basilea (18 puncts Gault Millau e duas stailas da Michelin). Undrads èn er vegnids Mathias Müller per il segund plaz e Valentin Minder per ses terz plaz, omadus che fan lur emprendissadi da cuschinar en l'hotel Waldhaus a Segl, ina da las meglras adressas en il Grischun.